


ALAHADY - FAHA 2 MANDAVANTAONA – A2020



I KRISTY NO ZANAK'ANDRIAMANITRA VELONA

Ry Kristianina havamalala, tamin'ny Alahady lasa teo isika nankalaza ny batemin'i Jesoa izay nampahatsiaro ny batemintsika isika : vita batemy ka irahina, izay koa no mampiditra antsika amin'ny vanimpotoana mandavantaona mahatonga antsika hivelona ny batemy fa indrindra amin'izao taona masina ny misiona izao ka mahatonga antsika hirahina, EOV misionera, taona mitondra antsika araka ny averimberintsika matetika amin'ny

Vakiteny I : Iz. 49, 3, 5-6

Tononkira : Sal. 39,

Vakiteny II : 1 Kôr. 1, 1-3

Evanjely : Jo. 1, 29-34

fankalazana ny faha 100 taona FET AFAFI, izany hoe 100 taona ny FET nivelona ny batemy ka nitondra izany amin'ny mpiara-belona, mitondra antsika koa amin'ny fankalazana ny kongresy eokaristika. Eokaristia anorenantsika ny finoantsika, ny finoana no mahatonga

antsika ho zanak'Andriamanitra, fanomezan'Andriamanitra ny finoana ka isika no mandray azy, mamaly azy, rehefa mandray azy dia ho tahaka ny voalaza amin'ny tenin'Andriamanitra androany, i Md Joany Batista no manolotra sy manoro ireo mpianany sy ireo tonga teo aminy fa io Jesoa, io Kristy izay midika mpamonjy, mesia, izy no zanak'Andriamanitra, indro ny zanak'ondrin'Andriamanitra izay manala ny fahotan'ny

olona, izy ilay nantsoin'i Joany hoe ; « *Izy no ilay nantsoiko hoe: Misy lehilahy avy ao aoriako, sy efa tonga eo alohako, satria talohako Izy. Ary izaho tsy nahalala Azy; fa mba hampisehoana Azy amin'i Israely no nahatongavako manao batemy amin'ny rano* ». Izany hoe hitarika ny olona hanatona an'i Jesoa no nataon'i Joany Batista, izany ny atao hoe misionera ary i Jesoa no misionera voalohany hitarika antsika amin'Andriamanitra, sy amin'ny famindrampon'Andriamanitra, izany koa no nataon'i Md Joany eto, hitarika izy hanatona an'i Jesoa, tsy nofeheziny ho azy ireo mpianany. Araka ny fantantsika dia izy no naniraka ny mpianany hanaraka an'i Jesoa, izany no atao hoe toe-panahy misionera. Tsy mpitarika ara-pirehin-kevitra ka mamoritra ny mpianany i Joany. Tsy mpitarika olona hanompo azy na hikarakara azy toa ireo lehibem-pivavahana sasany fa Mpaminany izany olona mahafantatra ny sitrak'Andriamanitra ka mitarika ny olona hanatona an'Andriamanitra. Eto i Joany hitarika ny olona hanatona an'i Jesoa mba hahatonga ny olona handray an'i Jesoa, izany tokoa no maha misionera antsika, izany no ezaka ataontsika amin'ny famenoana ireo siny enina. EOV misionera manantanteraka ny irak'Andriamanitra dia isika handray an'i Jesoa ka hitondra an'i Jesoa eo anivon'ny mpiara-belona ka raha mihaona amin'i Jesoa ireo mpiara-belona, dia hiova ka hampiova zavatra maro, hiova ny fifandraisana amin'ny zava-boahary, hiova hahatonga azy hivelona araka ny sitrak'Andriamanitra dia tsy inona fa isika hanao ny marina, hampanjaka ny rariny sy ny hitsiny, ka izany no lèlana hahatonga antsika amin'ny fiadanana sy fananteanana.

Ny misionera dia mpandrafitra fanantenana, satria maro ny harenina, potika ny zavaboahary, manjaka ny herisetra, manjaka ny halatra, ny fitapitaka, ny fifamonoana, potika ny maha olona , tsy hita intsony ny soatoavina, ka ny fifandraisana amin'Andriamanitra dia potika toa izany koa.

Matetika ny eveka ray amandreny amin'ny hafatra alefany mamerimberina hoe, maro ny olona mivavaka na marimarina kokoa maro ny olona mandeha ampiangonana, kanefa mipetraka ny fanontaniana ahoana marina ny fifandraisana amin'Andriamanitra ? satria raha mihaona marina amin'Andriamanitra ireo olona marobe izao dia niova ary afaka nampiova ny manodidina azy ? Nefa indrisy toa tsy hita ny vokany ? Amin'ny maha misionera antsika, dia hiezaka isika hanampy ny olona hiombona amin'i Jesoa satria raha miorina amin'i Jesoa isika dia miova ny fiainantsika ary hampiova ny hafa, izany ho atao hoe fibebahana.

Io no andrasantsika sy antanantsika amin'izao fiomanana amin'ny fankalazana ny faha 100 taona ny FET sy ny fankalazana ny kongresy eokaristika izao mba hibebaka isika, izany no tian'i Joany Batista ambara, izay hitantsika hidinan'ny Fanahy masina, hoy izy no Jesoa, ary i Md Joany Batista noho izy nihaona tamin'i Jesoa , araka ny voalazan'i Md Joany Evangelista dia sahy milaza « nahita aho ka milaza marina fa izy no zanak'Andriamanitra », « *Ary nilaza marina i Joany nanao hoe: "Efa hitako ny Fanahy Masina nidina avy any andanitra toy ny voromahailala, ka nitoetra teo amboniny* ».

Izany hoe nihaona tamin'i Jesoa i Joany ilay mpanoratra ny evanjely, nahita an'i Jesoa ary famonjena ho antsika, dia tsy nofinofy fa olona miara-dia amintsika miantso antsika hiala amin'ny ratsy, izany no adidy maha misionera hitarika ny olona hiala amin'ny ratsy ka zary fahariana vaovao eo amin'ny fiainana andavanana dro, izany no ambarany

tenin'Andriamanitra androany, mba hihaona amin'i Jesoa isika ka raha mihaona aminy isika dia hiova tokoa ny fiainantsika ka afaka mampiova ny hafa ary izany no voalazan'Izaia mpaminany.

Fantantsika ny asan'ny mpaminany, izany koa ny asan'ny misionera, manambara ny sitrak'Andriamanitra afahan'ny olona ka mihaona amin'Andriamanitra miova ka zary fahazavana sy fanasina ho an'ny manodidina « *fa hatsangako ho fahazavan'ny firenena ianao, mba hitaran'ny famonjeko hatramin'ny faran'ny tany* », adidin'ny misionera izany, tsy hiasa irety izy fa aoka ho fantantsika amin'io hafatry Izaia io tsy irety isika fa entanin'ny Fanahy masina, Ny Fanahy Masina no mialoha lèlana antsika manambara amintsika ny fisian'Andriamanitra amin'ireo manodidina antsika. Asongadin'i Md Paoly koa izany ao amin'ny vakiteny faharoa, « *ho aminareo anie ny fahasoavana amampiadanana avy amin'Andriamanitra Raintsika, sy i Jesoa Kristy Tompo* ».

Io fiaharabana apôstôly io dia fiarahabana misionera, rehefa mihaona amin'i Jesoa isika dia miova ny fontsika dia ao amintsika ilay fahasoavana sy ny fiadanana ary feno fanantenana isika satria miombona amin'i Kristy zary mitondra an'i Kristy eo amin'ny manodidina antsika ary isika mitondra an'i Kristy no hery sy angovo ary tanjaka hahafahantsika miatrika ireo ady amin'ny ratsy, tsy ady amin'olona sanatria satria, tsy anjaran'ny misionera izany. Tsy mpamoritra izy fa hanampy ny olona hiova fo, ka rehefa miova ny fo dia afaka mampiova ny fifandraisana amin'ny zava-boahary, eo amin'ny fiaraha-monina, amin'izay hanjaka ny fiadanana araky ny hafatry ny Papa tamintsika tamin'ny fankalazana ny andro manerantany ny fiadanana, hanampy antsika ho feno fiadanana ~~izany~~, ka ny fiadanana dia mitondra antsika amin'ny fanantenana, ka ny fanantenana manampy antsika hahatsikaritra mandrakariva fa afaka miova isika, afaka mibebaka dia zary hiombona amin'i Kristy hitory ny vaovao mahafaly eo amin'ny mpiara belona.

Ry Jesoa Kristy ô zokinay ô, miditra amin'izao vanimpotoana mandavantaona handalinana ny finoana izahay fa indrindra amin'ny taona masina ny misiona izao, fotoana sarobidy mba iezahana tokoa handray anao raha mihaona aminao izahay, dia hiova ary rehefa miova izahay dia afaka hanova ny hafa ka omeo ny angovo avy aminao izahay, omeo ny fahasoavanoa izahay mba hahay hanambara izany vaovao mahafaly izany dia ianao no mesia tahaka ny voalazan'i Md Joany, izy nilaza ny marina « izy no zanak'Andriamanitra », izahay koa entanin'ny Fanahy masina ka hihaona aminao ka hilaza tahaka an'i Joany eto, mahita aho ka nilaza marina fa izy no zanak'Andriamanitra ka afaka hanambara izany vaovao mahafaly izany amin'ireo manodidina noho ny Batemy noraisinay. Ampio ireo mpitoky vaovao mahafaly fa indrindra amin'ny tany sarotra, sy ny eto amin'ny diosezinay hanana ny herim-po araka ny fahasoavanoa, ho tahaka an'i Joany Batista izy ireo hanambara amin'ireo manodidina fa ianao no mpamonjy. Ianao tokoa manko no nifidy an'i Joany hampiseho anao amin'ireo mpianatra sy ny manodidina, fidio Joany Batista maro eto amin'ity diosezinay ity fa indrindra amin'izao taona masina misiona izao ka mba ho misionera hanambara anao tokoa izy ireo

hanambara fa ianao tokoa no Mesia, ka enga anie izahay ho EOV misionera mpanorina ETA tranoben'Andriamanitra ka ho taranaka mpanorina izahay amin'ny atao nay rehetra. Amen

Mompera Arseveka Ramaroson Benjamin